

四庫全書

集部

欽定四庫全書

集部

句曲外史集卷上

詳校官編修_臣范來宗

中書_臣劉源溥覆勘

覆校官中書_臣呂雲棟

校對官中書_臣朱忻

謄錄監生_臣陳昌敬

欽定四庫全書

集部五

句曲外史集

別集類五

元

提要

臣等謹案句曲外史集三卷補遺三卷集外詩一卷元張雨撰雨字伯雨一名天雨別號貞居子錢塘人年二十棄家為道士居黃篔簹樓一時名公卿爭與之友雨手錄平生詩文甚富明成化間姚綬購求得之嘉靖甲午陳

應符讐校付刊凡三卷而以劉基所作墓志
姚綬所作小傳附之崇禎間常熟毛晉復取
烏程閔亢衢所錄遺佚若干首為補遺三卷
附以明初諸人酬贈之作晉又與甥馮武搜
得雨集外詩若干首合刻之仍以徐世達原
序冠於卷首雨詩文豪邁灑落體格適上早
年及識趙孟頫晚年猶及見倪瓚顧瑛楊維
禎中間如虞集范梈袁桷黃潛諸人皆深相

投契耳濡目染淵源有自固非方外枯槁者
流氣含蔬筍者比矣乾隆四十二年九月恭
校上

總纂官臣紀昀臣陸錫熊臣孫士毅

總校官臣陸費墀

句曲外史集原序

陶弘景在齊梁時掛冠居句曲山自號華陽隱居性雅
淡愛山水每經澗谷必吟詠盤桓尤喜著書賦詩旁通
陰陽醫藥之術朝廷屢徵不起世以高尚稱之後七百
餘年當元盛時貞居以儒者抽簪入道自錢塘來句曲
負逸才英氣以詩著名格調清麗句語新奇可謂詩家
之傑出者當是時以詩文鳴世者若趙松雪虞道園范
德機楊仲弘諸君子以英偉之才凌跨一代諧鳴於館

閣之上而流風餘韻播諸邱壑之間貞居以豪邁之氣
超然自得獨鳴於邱壑之間而清聲雅調聞諸館閣之
上諸君子亦嘗與其唱酬往還雖出處不同而同為詞
章之宗匠辟如軒輊詎知其孰先而孰後耶矧貞居博
學多聞襟懷灑落故大夫士多景慕而樂道之也夫隱
居負時世先後好尚問學似未可以同日語然隱居之
清風高節貞居之雅度逸才亦可謂前春而後應豈非
句曲山清爽之氣鍾秀於二子歟以吾夫子中庸之道

修己治人金聲玉振之文昭著於天地間使於學道而望洙泗之科猶未易量也至若奔競功名蹀躞聲利醉生夢死不自覺者則二子之罪人也抑其風度其將追嚴子陵陸修靜之武歟易曰不事王侯高尚其事二子其庶幾乎貞居張姓雨名伯雨字貞居其自號句曲外史世人稱之吳郡徐達良夫序

欽定四庫全書

句曲外史集卷上

元 張雨 撰

五言絕句

東漢高士詠十四首

八月十三夜風雨淒其慨念東漢諸逸民取
大蘇公中秋冷坐無因醉半月長齋未肯辭
為韻

子相足周旋

一作也

破此家產豐陰功誰為書得來華陽

中

右鎰翊

子相真誥作子翔得道任華陽右理中監

入山服黃連還鄉騎青牛借得

一作問

五嶽圖

缺去三千

秋

右封君達

戾光與德耀布衣心耿耿長夜五噫歌誰念空山冷

右梁鴻

難與助為理聊復共偃臥文叔迫我甚客星

一作誰云犯帝

座

右嚴光

老瞞實雄猜乃忌仙者徒鱸魚既可膾蜀薑不可無

右左慈

貴誠不如賤富誠不如貧自無子平易孰悟損益因

右向長

贈行青竹杖壺中有餘地如何一升酒盡日登樓醉

右費長房

破甑久生塵短衣不掩骭還渠一斛麥所拾已雜半一斛

一作
六斛

右范丹

臥龍拜牀下劉表安能屈照見採藥蹤猶遺鹿門月

右龐德公

欲追薊先生白雲迷其方驢鞭不可執一作振壽與銅狄

長

右薊子訓

吹笙古仙人政要玉棺埋借問雙飛鳬何時離縣齋

右王喬

公是伯休那賣藥價不二却問奪牛翁徵君當過未

右韓康

養壽慕松喬潔已配箕潁穴居七十年

一作七十
事免置

娶妻

終不肯

右矯慎

逃名名我隨避名名我追去去南北山與世從此辭

右法真

奚官洗馬圖

曾侍赤墀東
天池看浴龍
晚涼湖上夢
猶立柳陰中

明皇按樂圖

髯伶識樂句
我信曲有誤
月白商聲多
塵起漁陽戍

古意

吳綾光纚纚
織成鯨掉尾
美人不敢裁
恐觸波浪起

夜思

空山嘈夜雨幽人坐惆悵今夕楚礪泉明日秦淮浪

玄洲倡和

茅山玄洲精舍左右真仙古蹟曰菌山羅姑
洞霞架海鶴臺桐華源玄洲精舍紫軒火浣
壇隱居松玉像龕至治二年壬戌歲道吳興
溪上與松雪學士倡和十絕以記其處仍書

刻石山中

靈邱狀三秀紫雲覆其顛易我朝生質閱彼大椿年

右菌山

九疑得道女受事易遷家詩贈金條脫人逢萼綠華

右羅姑洞

日芒界金色虹梁飲鳳阿直把天孫袂烏鵲詎填河

右霞架海

靜夜颯靈風神君語帳中至今雙白鵠時下五雲峰

右鶴臺

華林清散景丹水碧凝脂落葉秋無數玄都額寄詩

右桐華源

李基遺故鼎趙嘯絕風雲悠悠千載下更復屬夫君

右玄洲精舍

玄窗太霞氣赤書洞古文借問軒中主莫是紫陽君

右紫軒

真火本無候真人自出現問埽劫灰餘幾見紅蓮變

右火浣壇

露壇栖妙蔭仙籟降靈芬何時三易帔重拂兩梢雲

右隱居松

瑞儀溫比玉

一作德

寶帔曲流光稽首大司命理住金

鄉

右玉像龕

六言絕句

烟梅睡雀墨戲

珍偶偏憐瓊樹寒香漠漠紛紛誰見羅浮月黑一枝同

夢梨雲

粧鏡

璧月朝朝瓊樹明星處處阿房不似千秋鏡裏與人能
鑒興亡

子昂風篁圖為葉景修作

不同主人看竹稍似隱居聽松一代親承墨妙葉公信
有真龍

七言絕句

元統元年冬十一月句曲外史菌山巢居成製

十小詩以自見錄呈華陽隱居資一捧腹

崇元館主在齊梁廼有元之吳郡張相望八百四十載

我居

一作
飯

鶴臺如故鄉

事見九
錫碑

望見飛檐松杪花下盤陰洞石聳牙老樵迷路疑

一作
驚

相問若個江東道士家

風水所言唯理氣眼明此術未全疎景純解道遊仙句

信是青囊有異書

縹緲洞庭連白雲綠橘黃柑能見分昨日扁舟尋好事

明年處士比封君

谷中僅僅

一作僅有

一菴住壇上累累白

一作唯餘數

石陳杖隨

流水過隣舍席與長松分主賓

但倚茅君為座主從稱外史作官街道家六經發願寫

深向石頭藏一函

屋壁

一作頭

置書碑版多雄白

一作

虹光怪鳳凰阿

玄洲地名

看

到空山

一作深山

十日雪竈突無烟奈爾何

肯借山中步障錦與作天下庇寒裘三尺窗櫺萬株木

不怕霜寒到上頭

只有天公終可倚我作巢居名倚天未必高虛無事業
負日讀書兼打眠

龍虎山中薛玄子瑯林築臺詩亦工應接箇山聊爾耳
非關千里事同風

龍虎山鄭良楚來從宗師入京

目送三峰鸞鵠群更憑谷口喚夫君莫嫌病臥牆東叟
留得長鑱管白雲

松下淵明為鄭明德作

歸來不為督郵輕
自為松根長茯苓
博浪金椎拈不起
倚鉏却讀相牛經

次韻答薩天錫見寄

推敲指點據吟鞍
苦為搜詩夢不閒
誰會鳳凰臺上意
手授黃菊看鍾山

寄題陳生華山圖二首

西祀曾尋箭筈天
雲臺石室故依然
雪驢嗅地鞭不起

一笑太平三百年

華嶽秋高不受寒
虎頭粉墨意蕭閒
赤城別有思仙夢

長在明星玉女間

海粟松雪酸齋雜書一卷戲題于左

長沙老筆混狂瀾

一作戲波瀾

刮耳鷗波點素紈

一作松雪憑誰染素

紈翰墨風流作三笑
最憐白紵一生酸

一作寒

湖上莫歸答吳養浩修撰

吳時止酒

樓外鴉啼暮雨微
歸鞭忙趁落花飛
若教禿髯翁能飲

肯羨山人倒載歸

凌波仙

春雲如水碧粼粼誰見凌波襪上塵
洛浦湘皋都是夢手中花是卷中人

吳興墨蘭

墨君石友是同參幾葉光風染碧嵐
悵望王孫杳何許年年芳草滿江南

曩讀葉靜齋草木子中一條云趙仲穆者子

昂學士之子宋秀王之後也能作蘭木竹石
有道士張伯雨題其墨蘭詩曰滋蘭九畹空
多種何似墨池三兩花近日國香零落盡王
孫芳草遍天涯仲穆見而媿之遂不復作所
記與此詩意正合而集中無之因附見于此
噫鍊崖之悲不其然哉石樓野生漫識

李遵道溪山春曉圖

誰寫江南雨後岑清寒空濶撲雲林何當載我圖書去

共試野航春水深

爛柯圖

一局棋殘爛斧柯
山中日月竟如何
歸來記得神仙著
不比人間局面多

詠梨花

折得瑤花第一枝
清明時節寄他誰
絕憐天上無真色
號國夫人淡掃眉

偶成

黃篋樓中枕書臥雙鶴交鳴驚夢破青天墮下白雲來
卷簾一陣楊花過

御史入山

喜聞宰相入山來急喚山童埽碧苔雲鎖洞天三十六
樓臺一一為君開

讀臨川集

班馬文章老琢磨咎夔心跡半彫訛執鞭願作鍾山吏
一袂字書隨白騾

春水

雪消岩溜注灣陂便有微瀾作渺瀰時見幽人來照影
蕭梁臺畔立多時

春酒

雪度青天落酒杯花枝半拂角巾推陶公醉石蒼苔滿
不見猖狂李白來

春燒

日落山前野燒生白茅黃葦地初晴明朝卻賦雉帶箭

呼酒岡頭看火城

寄馮海粟待制附天目僧過廣陵

天目峰頭一鶴回
白雲持贈當寒梅
瓊花觀裏開包處
寄得玄砂白紙來

三都一序爭傳賦
借重西州皇士安
慚愧山圖經品藻
苦心留得後人看

昨日淮南名八公
揚州擬看醉圍紅
賺人鷄犬雲中去
策轉江頭控鶴童

玄洲獨坐偶成

簷外菁葱玉樹排
小山叢桂近當階
出雲好看鸚鵡頂
雲出鸚鵡輪忽被埋

墨海棠

漢宮愁絕冷煙枝

一作
烟枝

一蘸顰郎兩鬢絲
甲帳夜寒銀

燭冷六銖雲帔獨來時

東坡書蔡君謨夢中絕句二放營妓絕句三虞

伯生題四絕于後真迹藏義興王子明家要

予次韻凡九首

日將公事湖中了
醉入重城列炬明
自古大藩財賦地
古人偏得賦閒情

謝女嬌吟雪比鹽
北臺馬耳見雙尖
衲衣政索歌姬笑
不道春寒繡被添

寫韻軒中塵不驚
與誰同躡鳳凰翎
綵鸞可惜情緣重
只合清齋寫道經

釵頭新綠荔枝紅
那與江桃色味同
聞道端明新進譜

一時殿閣起薰風

香辟春寒玉辟塵流蘇斗帳醉和春一雙明月都無價
寂寞人間第二人

江南在處烟波好浪迹先生不上船近就闔閭城下宿
可憐霜月夜娟娟

青城樵者一衰翁寫罷烏絲滿袖風消得玉堂金研匣
至今傳入畫圖中

聽碾龍團怯醉魂分茶故事與誰論纖纖玉腕親曾見

祇有春衫舊酒痕

白公種竹蘇公柳談笑功名後世誇
依舊封雲三萬丈
斷橋誰與築堤沙

山中

一枝石瘦如麋角六出花開似麝臍
隨意莓苔一杯酒
也勝騎馬聽朝鷄

顧定之竹石

龍孫乍脫襁兒錦石面都皴彈子窩
畫妙通神欲飛去

虎頭癡絕奈渠何

李仲賓雪竹

斷鱣黯淡何人墨
四十年前老薊邱
向使戴家多種竹
雪中那肯便回舟

吳興道中

書淫畫聖王孫老
雪艷沙明湖水清
黃庭不用鵝群換
也許山陰道士迎

李鍊師雲閒卷

朝隨飛鶴出簷端
倦鳥紛紛莫與還
若似山居無用者
此身政不羨雲閒

溫日觀蒲萄

日觀一飲西涼酒
解寫蒲萄絕代無
請師截斷葛藤路
還我黑月摩尼珠

桂枝詞

桂樹叢生枝婀娜
糝栗黃雲欲成朶
薰醒秋衣懶下牀
金蟾嚙斷燒香鎖

書道童總管贈蔡霞外詩後

多病潛夫嬾入城
旋營草閣看陰晴
竹宮桂館花繁處
乞與霞僊爛熳行

新居快雨戲筆

旋埽林扉一榻橫
綠陰幽底水紋平
閒眠愛殺荷溝雨

玉磬池邊無此聲

玄洲精舍玉磬池皆石骨也

予昂墨寫萱草

碧浪湖頭翰墨香
山蜂遊趲午陰涼
戲拈小筆塗幽草

正自無憂得可忘

林泉高士圖

我本玄真老孫子意托綸釣相娛嬉浮玉山前一瓢酒
頗恨時無顏太師

潯陽琵琶圖

一幅面屏秋月圓荻花楓葉染江天江州自是無司馬
多少琵琶上別船

馬遠小景二首

柳未藏鴉雪未消春衫遊子馬蹄驕去年沽酒樓前路
錯認桃花第一橋

玉砂卷海白糝糊千樹梅花埽地無彷彿水仙祠下路
金枝翠帶不勝扶

葛嶺新居

葛洪川上有餘地善和里中無故書為惜人間秋水觀
鷄鳴犬吠又移居

臺掾薩天錫求識予面而之燕南八月十四夜

風雨宿茵閣絕句七首明日追寄之

李公求識少陵面未聞草堂三日留看君用意古人上
却愧無言與獻酬

鶴臺道民掩柴扃鴈門才子宿寒廳恰有金華一樽酒
且置茅家雙玉瓶

巡官畏虎盛前呵驚動燕山蔭照磨剪燭對牀詩未穩
從渠醉尉問誰何

物華年鬢兩駸駸憶別何堪動此心喬木萬株天一握

菌巢獨自看秋陰

高情常愛白雲多
雲為漫山雨注河野人寧知御史雨
祇見石田蘇晚禾

走送蒲衣菴外路
歸時望見赤山湖林子求看換鵝帖
胡郎傳送捕魚圖

內臺最近燕南幕
博士臺郎有此除山澤何當大人賦
寄聲多謝馬相如

緝熙殿御製墨梅詩帖

宣和妙賞縉衣句傳在夷門作勝談行殿春風四十載
玉妃終老向江南

王子明求題高侍郎雨竹

雨立修篁似戟枝墨君留影故傲傲房山祗憶巴山夜
及見官奴把燭時

樓居春曉望玄圃

時寓杭州
開元宮

子晉新宮倚太霞繞湖烟火萬人家觀臺一面無人處
日出烟消都是花

四賢帖

四賢者伯長袁侍講伯庸馬中丞伯生虞侍
書時中劉待制玄卿裝潢手書成軸命予題
識遂即虞公絕句韻書于後

四明狂客已乘雲海內文章有二君可惜戴華劉伯壽
只今零落鳳凰群

月夕愛南窗竹影

兩叢小竹南窗下露葉風枝共秋夕月明見影忽自笑

移得王淮鳳翔壁

李士行枯木

兩株蒼柏如蓬首皮毛剝落心不朽曾見春風春雨來
相看喚作忘年友

仙山樓觀圖為馬仲禮作

憶共能書蔡少霞良常洞口看桃花人間詩酒耽迷了
三百年來不到家

張公甫鍊山隱居圖

鍊山曾照鍊衣寒南渡功名有足觀
不見元豐全盛日
錢鏐孫子已黃冠

隱居圖

壺漿相餉過溪東
縞袂青裙笑語中
何必桃源尋舊路
太平閒作祝雞翁

趙魏公寫生梨花折枝

玉面渾無獺髓痕
春風洗綠上飛裙
遙知姑射山頭雪
化作楊君夢裏雲

張仲敏鈞勒風林

墨君神駿出洋州形似無如老薊邱可惜風林半窗月
試憑老眼為雙鉤

鶴山書院

寂寂茅堂掩畫門藤陰花氣小池渾也知建鄴青精飯
不到臨邛白髮孫

覺林院

石湖園中數株石堆向覺林僧子家眼前醒醉若無語

領客繞庭唯看花

歸自雨中寫况寄景修博士

蛙處水連圍屋草鳩時雨爛覆簷花移過書窗金鵲尾
祇言渾似野人家

葛嶺東樂閒高士并寄公文道弟

葛洪井上訪貞居一飲甘泉足自如拂袖莫嫌狂散甚
子非知我我知魚

次韻實喇卜郎中題襄陽官舍

峴山日落春風起竹塢湘桃零亂開倒著接羅馱瘦馬
無人知道使君來

葛嶺雜書

小娃小艇無蹤跡只有荷花雨濺裙淨洗一方天水碧
不教歌板污游雲

仲敬畫華陽草堂圖

珠樹風來學鳳鳴玉泉雨過作琴聲識得良常洞中路
前生我本山玄卿

導道竹枝

篋簍谷口白雲生雲裏琅玕萬玉聲驚破幽人春枕夢
一窗斜月半梢橫

避暑圖

雪藕冰盤斫鱸厨波光簾影帶風蒲蒼生病渴無人問
赤日黃埃盡畏途

徑山寺僧山水

澄心蠶紙墨花香上有元暉古印章怪底徑山山寺裏

老僧衣袖著瀟湘

白無咎黃蜀葵

金銅仙人雨中立鉛淚恰如辭漢時傾心脉脉何所待
願見白日光陸離

修竹士女圖

空谷佳人玉珮璫琅玕斜搭領襟長杜陵野老多才思
解道風吹細細香

墨杏花折枝

折得隣牆紅杏枝
春風偷染墨臙脂
恰如誤入仙山路
虎嘯林深月暗時

五言律詩

晉彥博士以詩索和甚媿率然觀者勿笑其窘

步

鑿磝盛春雨新流遶舍前
何當留太白相與學思玄
碧洞無人掃丹梯有路緣
催詩苦云迫莫笑竦鳶肩

輔成觀張上卿墓廬

青牛謝車御白鶴嘆人民閣有凌烟像橋無進履身平生玉櫺具此地石麒麟蕩蕩傳宗業中朝倚外臣

風雪中得金陵諸公書二首

雪作衆禽驚窗幽亂霰鳴愕然身獲落莫矣歲崢嶸松竹聊娛拙乾坤苦忌名故人不相貸書札到柴荆

落木從風靡支流趣谷斜山空不須說歲去若為遮飢鶴擣窗紙寒魚嚼雪花推書更一作抵清坐席暖到昏鴉

天谷菴

宣和金壇郎郭高士之居也

十三科取士救世豈無方
儵送孤鴻舉難追
八駿驤金壇猶著號
碧落舊為郎
劒化丹爐在山寒
井水香

碧玉菴

四明袁氏

廿四岩前客能忘
賀監居
乖龍噴草檄
古象泣遺書
把袂風塵表
近公冰雪如
時來青瑣闥
晚節要蘧廬

湖寺擁碧軒

喧寂一塵隔
湖濱出寶坊
荷陰分補衲
水氣雜燒香
書勘烏皮几
茵敷白氍毹
牀從來已公屋
詩客許徜徉

萬致柔還省親舍僕聞而往候道中得此

數里平岡路仙山迹漸分柴荆來鵲語村落去人群粉
陣松崩雪濤頭日濯雲不緣停僕御直以候夫君

寄洞庭王子正

一本題云聞
洞庭之勝

洞庭山似簇銀闕翠芙蓉安得滄浪子同尋縹緲峰魚
龍隨水落橘柚待霜濃未必桃源似雲帆躡去蹤

奉和揭學士聽松軒

何年種松子此地聽松聲濤響風還作山空夜自明一

瓢嫌物累九奏感時清得似蒼髯叟長依白玉生

孤山晚步寄和靖掌祠懷中庸子

瑪瑙坡前立荒陂接葑田試從樵子徑往覓僕夫泉衆
草寒猶短群峰晚更妍誰歟結真隱共老太平年

十二月三日雪

快雪真無價豐年定有期臘前才一白至後已多時玉
展琳琅步花團蛺蝶枝春風在天上飄入萬年池

煮石窩

仙人白石子服食受奇方王烈猶冷髓初平枉叱羊砂
牀收箭鏃玉屑備糗糧借爾彌明鼎行窩到處將

良常草堂圖

隣近方隅洞良常別有天草堂朝看雨藥圃夜春泉邈
矣盧鴻乙奇哉魯仲連君看遺世者若箇是神仙

齋居偶興

絕澗多靈石中開小洞房醉醒依竹素晴雨看梅黃樹
暗鶯聲澁岩虛水韻長未能超賈馬自足上羲皇

午日東楊廉夫

客有擁琴至吾寧折簡招足音垂谷口雨氣截山腰酒
倩紅泉瀉花為絳節朝不嫌泥濘極一舸段家橋

雨中

推枕遽然覺高齋人跡稀卷簾芳草短看雨杏花肥薄
莫寒仍在中林願稍違一遷隨谷鳥喬木是耶非

除夜

忽忽歲云暮徒興白首嗟山留待伴雪春禁隔年花把

卷因遮眼分餽且膠牙自緣身懶惰莫遣送窮車

礪北梅缺三月始華

陰礪殘梅枿臨流一向欹但存孤注在敢恨一生遲凍
雨如相煦春寒不受吹後時翻見獨宰物遂成私

萼綠梅

山中古仙子無言春寂寥玉容澹朝雨翠氣濕微霄臨
風怯玩影弄雪妬攀條擬覓何郎句還憑翠袖招

山水便面為柳道傳作

篋笥秋非遠塵埃暑實煩遂游千里目稍待一涼恩僧
閣依旁嶺漁梁跨別村誰能從象外試覓武陵源

馬伯庸御史石田山房

監州遺愛地御史讀書堂絃誦猶懷魯田園獨在光白
茅編野屋翠竹被溪梁欲賦淮南隱知君意不忘

寄樊子中打碑者

樊遲詎學圃可論金石交常賦舊文字如見古陶匏漢
篆龍回壁梁書室卧蛟墨卿吾與爾聊復隱三茅

呈揭曼碩學士

柴荆馬糞間蛛網動相關閣老因移疾鯁生賴訂頑雨
涼新竹健沙僻睡鳬閒如許清秋意扁舟猶忍還

曲密亭

水盤山復屋亭此可婆娑蝸角地雖少蜂房春自多橘
藏商皓樂鳳憶楚狂歌何必天津上遠尋安樂窩

屋當作屋

流杯碕

古木蟠幽磕層巒疊翠臺水歸蒼玉峽風引綠荷杯我

自知魚樂人誰被
襖來惜無鼠鬚筆
寫記刻岩隈

菌閣

岩架菌芝出榜題
松雪扉雲來畫簷
宿龍向墨池歸對
几琴三疊倚闌山
四圍仙靈能夜降
應得噉玄機

積雨

飽聽三峰雨閒題
七月詩水深荷意
怯田冷稻心遲
龜
鼃陰爭盛蛟龍勢
亦隨蒼茫不可問
身外付雲移

早秋

每嫌新酒少尚喜故交稠
籬落三家墅梧桐十日秋
月生微顧兔星淡沒牽牛
亦欲觀多稼江湖雨未周

次韻元鎮玄文館有懷

林氣早知雨黦淡研苔滋
素飈驚閒幔朱實委清池
將整還山旆復亂故園思
拏舟倘未遠弭棹一來茲

開元貞人見遺劉商觀奕圖
石刻毫髮布縷皆盡精妙
蓋李龍眠臨唐畫本茅君
彥模勒為玉局仙翁所藏云

薪桂蘇蘭者能來立坐隅徒聞玉楮刻遂信石枰圖妙
蹟傳仙李高名重大蘇向來林下意不敢易樵夫

乙亥元日試筆

四日
得春

自古三朝節于今一笑看問年書亥字獻歲出辛盤黔
突多蒸朮紅冰賸浴丹行行追勝事步步埽春寒

無錫華子英谿山勝槩亭

共愛谿山住輸君勝槩多疑將草堂畫展向鏡湖波鶴
雀深松栢鳬鷺足芰荷更修仁知術鄉社樂婆娑

五言古風

蛛網落花

飛花墮錦茵蛛網解留春
露垂沾更重風破舞還頻
不逐燕嘴泥寧隨馬足塵
遊絲復染惹流浪何足嗔

題墨蘭贈別于一山之京師

三月愁送客春寒雨如霰
冥冥返塞鴻悄悄栖梁燕
揚帆五十日蓬萊望中見
欲持猗蘭操一奏南薰殿

雪齋

騎驢吟雪詩煮茶煎雪水何如埽一室置身虛白裏君
家有故事高卧殊未已

龍洞

山中春水泛蛻骨長於樹拏舟探穴口甚深不敢渡窮
冬桃始華爛然珠光處

張師夔畫謝家池塘

春風颯然至幽人午夢醒遙見池塘綠不知春草生如
何騎馬客亦向夢中行

春山晴靄圖

危亭面懸瀑深塢著茅堂群木相掩薄風披如有香避
世真樂土欲往川無梁隱淪倘見招歲莫從徜徉

蘭雪齋為金壇王敬賦

謫仙有妙語清風洒蘭雪高懷千載下子獨慕芳潔春
冰斷瑞花晨露滋奕葉端居味道腴光景庶不滅

再賦天池

龍從古墩邱泓潭浸其股金碧爭蕩磨穿穴稍旁午斬

松羅石榻玄芝錯神游遙應玉女盆潤及黃精圃

濱洲雲巢圖

張彥輔畫

蒼山不受寒裏以白兜羅借雲以為暖我意不在多小
營丹鶴巢高栖翠雲柯飛仙度鸞笙老人卧雞窠誰能
江海去風雨一漁簑

寄題劉彥基丹室

昔聞冲虚宮遠在錦江頭往來多異人東望不可求借
問鴻寶書枕中今在不尚餘一丸藥光景夜不收食之

生羽翼飛去十二樓下視何蒼蒼至情難久留我將拾
瑤草遲子於玄洲

十月十八夜震澤風大作明日大雪異常又明
日甲子日出大寒

弱齡逃世網一勇以求志折旋四十載竟日坐有累大
拙使為巧小樸使為器用是役於人夫豈足言智飄風
鼓具區如我長噫氣追惟年運往通夕遂忘寐聖人罕
言命天道殊難致委順待未來餘日敢終棄

次韻晉卿翰林贈陳秉彝

金華黃太史出為儒臺冠詩文齊六經奇古誰敢傳如
掇明月珠妙在九曲穿而子工筆札狗監非所薦挈之
登龍門果獲尾時彥孜孜勤執經矻矻勞染翰敏手不
暇給精華且屢換憐才吾輩事子乃羞自獻由茲數來
往無事輒相見湖嶺錯縈紆烟霞爭變幻一夕快雨餘
春物已消半言歸天台奧俄頃語離散此手不易執明
日柁樓飯迢迢望白雲瀑布聲許悍赤城跨滄海朝霞

以為岸倘遇仙者徒勿易樵牧賤予衰志求道千載猶
莫旦老經三百家一一理殘卷霜毫犯冠籜墨汁滓衣
汗何功使願果盡力輸老腕子書能瘦硬淚眼秋隼健
唯餘篋中字照我目光爛送子望崖返回目窮海甸春
夕豈不短反側移漏箭纔夢金庭游還逐濤江亂海知
家庭樂旭日陰始泮身扶老人杖衣憶慈母線還期當
及時遲子秋水觀栖栖寡儔侶孤坐至日晏追步太史
作用以申繾綣

五言長律

書懷二十韻奉呈虞集賢

昭代千齡運斯文一柱功初當延祐日晚識廣陵公朝
士因推轂先生猥擊蒙睽乖遺廿載寤寐接孤風太史
山川彥仙儒館閣崇置身清切上用志杳冥中句法黃
初過才名冀北空朔南馳使節江漢借歸篷酒問餘杭
姥泉尋六一翁境非秋水觀寺即紫微宮侍坐要王遠
移家近葛洪於焉承咳唾足以振罷癯卓爾身為貴胡

然老見攻戰肥終道勝德重豈途窮玉趾閒迂步麻衣
病鞠躬茶烟窗冉惹墨沼樹玲瓏飢甚無瑤草招來有
桂叢輸心何落落把袂輒匆匆易進乘軒鶴難追戲海
鴻明朝去吳會長笑為誰雄

元日雪霽早朝大明宮和辛良史省郎廿二韻

并序

延祐改元三月民瞻石宰相遇京師承需鄙
作且辱先施之惠林下朽生不能造館閣綺

語幸於言句外求之愧悚而已

纔設中庭燎俄看密霰飄歲開環甲紀星動指寅杓鳳
集天門榜珂鳴月殿橋卿雲同四表和氣集三朝陞級
肪初截雲層玉旋雕句陳分彩隊步輦簇青腰積屑承
盤重吹花到笏消逶迤光斧座凌亂綴珠翹樂共鑪烟
合班隨翠袖招閭風游廣漢玉局道逍遙北戲魚龍舞
中巖虎豹調旌旗攢鬣負冠劍掠招搖穆酒曾觴母洪
崖及見堯萬年臨紫極一白慶璇霄朝會儀如此騫騰

意頗饒身唯參寂寞世豈絀紛囂姑射消疵癘蓬萊倚
沈寥瑤華攬戴勝珠樹引回鑪有術探鴻寶何人識夔
焦竟須窮海岱直擬並松喬書就神牀寫香從別室燒
憐君守華省琢句廢春宵

茅山四十四代宗師牧齋真人昇仙謠

昔愛西城記華易許徧窺醉持龍節舞寒借鹿裘披祗
憶山中樂寧期世外悲及傳南嶽劒難駐赤城師畢道
能無待玄科本有期紫宮新坐席金籙古威儀菌石哀

泉咽松花泣露垂他年歸白鵠尚慰里民思

古詩長短句


姑惡

村南村北麥花老姑惡聲聲啼不了有姑不養反怨姑
至今為汝傷風教噫君雖不仁臣當忠父雖不慈子當
孝

墨龍

高昌世子寫墨龍此龍乃出開元東井中東井水與天

河通龍下取水遺其蹤道人識墨帝子逃入世子之筆
鋒井頭夜半飛霹靂元氣淋漓雪色碧一鎖銀牀五百
年纔點目睛生羽翼



句曲外史集卷上

欽定四庫全書

集部

句曲外史集卷中

詳校官編修

臣范來宗

中書

臣劉源溥覆勘

覆校官中書

臣呂雲棟

校對官中書

臣朱炘

謄錄監生

臣陳昌敬

欽定四庫全書

句曲外史集卷中

元 張雨 撰

七言律詩

范以善雲林清遠館

華陽

一作雲林

范監居幽眇不到玄窗未易逢山氣半為湖

外雨松聲遙畚嶺頭鐘嘗聞神女騎龍過亦有仙人控
鶴從安用棄流三萬里小天元在積金峰

盧疎齋集

盧疎齋集宣城校官本讀之一過生氣凜然
有懷哲人援筆而賦

人物西清第一流曾看繡斧下瀛洲難求冀北千金骨
空載江南數斛愁小謝夢無青草句大蘇詩有景疎樓
敬亭依舊峨嵋月付與騎鯨一作盧遨汗漫游

書東坡先生畫像

峨嵋秀色杳難攀玉局仙人不受閒南斗日躔一作辰韓

吏部西湖風氣白香山寧一作從教刺舌奸邪黨可惜低

頭侍從班試

一作更

問東坡鐵拄杖于今海上未曾還

寄謝張子壽御史京口留飲

時將赴湖南憲僉席間楊以吾鼓琴

替叟吹笛

賣藥南徐兩日留繡衣相對似清秋借抄衡岳元君傳

挽住湘潭使者舟安道推琴元有在

一作一琴何待破

桓伊弄

笛

一作三弄

若為酬歸來獨醉投山閣

一作獨卧林間醉

夢寄新詩

與率牛

宗師雲江還山虞侍講惠詩有詞請大洞錄

丹鳳樓前返羽車清詩滿袖出京華雕蟲徒刻三年楮
補袞應飡五色霞太白晚傳青綺帔元种早授玉門砂
要知不隔金閨步常是相從太極家

次韻柯敬仲學士見寄

柯時
悼亡

故人往往天祿閣我嘗夢見燃青藜重簾月落秋燕往
九衢塵動朝雞啼能傳米芾書畫學稍憶盧鴻林鶴栖
繇來避世向金馬諷諫得君寧滑稽

經碧浪湖奉懷吳興公

湖水秋空玉色勻，蒹葭纖雨上綸巾。
重來羊峴誰沾泪，却顧龍門不見人。
獨放酒船尋鱸具，誰容狂客吐車茵。
西風白羽元非用，只為人間苦障塵。

纖一作殘，上一作洒，苦一作善。

贈商學士德符

鞭鳳咎鸞

一作咎鳳鞭鸞

下紫烟，筆牀塵尾意翛然。一貧自信

如陶侃三絕，誰能似鄭虔。金碧瀛洲扶御宸，玉華仙露灑經筵。壽巖獨立風塵表，却笑靈椿是小年。

泰定丁卯沙溪元日

按誌是年外史蓋五十一矣

山世行藏本不羈江東節序片帆隨三朝猶是嘉平臘

一集

一作七字

又題丁卯詩赤石青林含古色白沙翠竹照

弄

一作

清漪春風浩蕩鷗波興終要南山霧豹姿

寄李季和

孰與言詩李髯叟一日不見已為疎因觀故京來白下

載聞新作過黃初小峰待月許攜被中林放鶴要迴車

杜陵醉歌不易得豈惜華陽真逸書

顧況號華陽真逸

舟次漏湖用柳博士夢薛玄卿詩韻寄倪元鎮

兼懷道傳明德

思遠重逢茅小君香消酒盡路三分五湖歸思浮天水
一霎秋陰過雨雲柳子篇章渾可法花奴絃索共誰聞
唯應自洗唐溪石填得金泥小篆文

曲林真人遺以乳石杯盤賦詩以謝

上黨攬天入醉魂元功有意琢雲根小於藥玉荷心殘
大稱霜皮木癭樽藉草飲時留洞吏隔花捧處倩山猿
殷勤更借彌明鼎寒夜聯詩酒屢溫

讀元次山集感而有作

漫叟古之賢達歟憤世直言七不如著書首補雲門樂
取醉政賴石湖魚湘中韶濩遺欸乃天下漫浪知猗吁
餓死杜陵拾遺老唯有春陵能起予

次韻劉伯溫御史春遊

草木幽馨磴道微白雲拄杖去如飛獨尋玉女洗頭處
相伴仙人采藥歸幾疊翠微深杳杳一簾紅素亂霏霏
可堪酒債兼詩債老却江南白苧衣

寄吳興趙承旨

亭下

一作門外

鷗波好放船蒼蒼葭菼水如天投綸漁父小

垂手化蝶秋蟲大學仙麻紙丹書應滿笈鱖魚紫蟹不論錢清真逸少誰同傳獨許華陽許叔玄

方廣寺石橋

綠玉飛梁碧蘚封羽人來倚瀑簾風偶翻貝葉經臺上與散曇華茗椀中有象到頭終幻滅無生彈指即虛空

一作解說是虛空

春寒大展三衣坐百衲雲山一線通

魏國趙夫人管君輓詩

子雍書
壙志

曾謁西池閼殿春賜加

一作封

大國寵疏頻擇壻當年郝

太傅能書今日衛夫人玉鏡離臺空掩月寶衣堆桁暗

凝塵千秋鄉中名不沒墓有通兒書老銀

歐陽率更子
通書母夫人

墓銘夫人
諱老銀

寄京師吳養浩修撰薛玄卿法師兼懷張仲舉

右謁因寄

百壺美酒那消憂數卷道書天與游既雨秋城苦泥淖

未寒病骨思衣裘看我目光牛背上憶君珮聲鳳池頭
情知契濶寧復語白鵠斯舉不可留

風起春城散客憂玉京臺殿憶同游雲開萬象森丹闕
金織雙龍盤翠裘此日聽雞趨禁籞何年騎鶴過山頭
從君試覓王喬術學化仙鳬任去留

十年京國總忘憂詩酒風流共貴游溪月夜遊鵲鵲觀
灤雲曉濕鷗鷺裘書來慰我臨池上秋去思君到水頭
更憶何人張仲舉于今江海為誰留

何當作可

題范德機編修東坊藁後

一編上有東坊字慚愧詩中見大巫直想瘦生如飯顆
竟從痒處得麻姑咸池水淺孤黃鵠空谷天寒病白駒
擬共風流

一作西風

接尊酒祇愁塵土沒雙鳬

御史中丞馬公伯庸有贈薩天錫還金陵長句

因次韻寄上

射策甲科今廿載尺書難信石城潮徑登烏府持天憲
猶倚青溪望使輅四月鶯啼夾城仗千官花擁大明朝

會因桂樹思真隱獨

一作曾

是淮南作賦招

次韻楊廉夫送僧仲猷歸澄江禮敬寺

千歲巖頭坐兩夏秋來忽夢刀頭環笑別白猿辭鷲嶺
飛藥赤鯉下仙山桂子紛紛向人落楊柳依依遲子還
子雲奇字不易得只許澄江窺一斑

危太樸入都為題雲林畫幅

故人渺在雲林端手種梓漆陰團團不憤讀書從鬼谷
何嫌賣藥近長安白日定趨天祿閣青春宜著鷄鵩冠

相思洒盡金壺墨三十六峰生莫寒

懷薛玄卿

丹樓百尺倚雲霄有客懷仙興獨高腰下蒼精纏寶氣
眉間脉理卷金毛擬招薛子青田鶴與釣任公碧海鰲
幸自蒼頑同木石思君一夕夢勞勞

二月病懷

煮藥香中聽雨眠都緣未熟養生篇雪消春水深三尺
日上花陰過幾磚世事悠悠高枕外衡門寂寂暮霞邊

自慚病鶴摧頽甚却顧雲霄意悄然

上清外史薛玄卿寄題菌閣且約以游武夷次

韻以答

餘杭山水著飛樓樓外長林地轉幽十畝樹陰閒濯足
一簾荷氣曉梳頭山濤舉代嵇康懶張說論文薛稷憂
蕭散人間兩外史平生猶一作俱欠慢亭遊

玄覽真人示以李遵道舊詩一章俾次韻悼之

將寄其子克孝

仙李如何竟小年滿堂圖障慘風烟青山捫蝨誰同話
赤脚騎鯨自上天名世豈唯書畫學起家猶望孝廉船
無因得寄松花酒一洒清明筆塚前

贈漁樵侶

郁木坑前負薪者道士磯頭垂釣翁我輩與結平生友
夫君還有古人風水羞涼味蒲芽白野飯晝香松菌紅
見說行藏多歲月不離三泖九山中

次韻楊廉夫見投

白髮黃冠歸故里某邱某水昔曾經石泉新處鑽槐火
山雨多時拾菌釘溪叟扶犁天際去隣娃吹笛夜深聽
杜陵醉眼元空濶解道乾坤水上萍

吾愛吾廬

吾愛吾廬聊復爾眼前白石與蒼苔水從林木陰中過

風自房

一作簾

櫳曲處來薄有餘情歸竹素竟

一作都

無長

物受塵埃先生閉戶成真

一作真成

懶詩債敲門不厭催

江山勝槩樓為龍虎黃希石作

仙人元自好樓居快展江山極目初天上孫登一絃曲
雲中梁鵠八分書金明海岫晨暎發玉奏風濤夜籟虛
跪席焚香疑有待麻姑行按小方諸

乙亥二月還錢塘書懷寄錙師魯

黑頭時與王孫別春草又青天一涯貧甚馮驩猶有缺
歸來丁令已無家葑田湖窄殘舟一作游船少墓道山荒剩

一作故屋斜還憶菌巢書數卷雪麋應護手栽花雪麋玄洲白犬

名也

答楊廉夫二首

弄水摘花春可憐
風雨倦尋茅步船
我家南塢有靈石
龍井西頭無杜鵑
野雀亂雛畏人過
弱柳委地起蠶眠
子雲胡為甘寂寞
後世何人知太玄

黃篾樓中惟飲酒
樓下長溝鳬鴈多
灣頭橋斷浮青草

湖面風來生白波
饒奴竟煮

一作取

脫裯笋老魚戲咬如

錢荷詔書寬大到
海角河北飢氓

一作民

爭倒戈

李寧之煮茶亭

桐君山下一區宅木茂土肥泉水香槎頭釣魚秋雨足
亭子煮茶春日長兩山徒為盤谷隱一水尚係平泉莊
莫厭身名俱隱約會見輜軒來晦岡

礪阿坐雨寄以敬

載雨過湖山雨重放水出山湖水渾窓風亂解叢篁
渠溜直穿雙樹根白須道士烟霞癖錦里先生芋栗園
想見南隣邱架閣也嫌泥濘不過門

十二月五日雪晴

丁亥

日光玉潔千峰立快雪晴時一氣凝
當晝壚亭推掃巷
犯寒漁榜借收冰
松皮石裂號飢鼠
窓隙塵消觸凍蠅
青茁菜芽渾可愛
倩誰春餽捲紅綾

張參謀席上奉餞高昌別駕朝宗通守如京師

併簡兼善尚書

梁溪宅裏閤烟霞
使者淹留日未斜
天上夔龍圖治道
舟中李郭望京華
十三絃送黃柑酒
第二泉煎紫筍茶
寄謝南宮達夫子
會同鷄犬憶仙家

讀戴帥初集

剡源詩卷落吾手便似移家太白峰學道昔慚山世遠
知人今媿郭林宗空山樂書有遺譜白日天馬無留蹤
太息斯人不可見厭將兩耳聞寒蛩

贈錙伯溫大監

臺閣如公最有稱輶車驄馬數能乘校書在昔專劉向
祕監于今復魏徵汗簡削成金作匱秦階平處玉為繩
信有仙人唯寂寞側身長倚白雲層

送鄭明德適越

四十日春廿日雨問花尋柳意茫然竹根臥瓶高筆塚
竈下生薪連朮烟茅家名餘鐵鑪步龍井氣脇金沙泉
稽山酒船速回棹遲子歸來烹蕨拳

虞先生送張元朴回龍虎有云麈尾每懷張外
史鵝群今屬薛玄卿元朴索次韻

想見先生戴笠行黃茅岡上看陰晴承聞祖道同疏傅
鄙說還鄉似長卿海內好詩元自少江西行李不嫌輕

謫仙愛與元丹語烟子而今亦有名

秋日晚興

暝色入林烟火微
暮雨欲來如有期
野雀喧爭棟樹子
幽人行把菊花枝
山空始見水泉洄
寒至乃索衣裘遲
莫惜題詩將寄遠
不多故舊在京師

道館雅集聽琴次楊彥常韻

幽蒿細竹滿牆間
雨後危牆似斷山
一室了忘塵世隘
諸君能賞病夫閒
池巡野鶴魚苗綠
土蝕秋蟲菜甲斑

我不鼓琴偏識趣絕憐失勢重躋攀

贈危太樸

莫怪道人居處僻柴門今始為君開曾從小有探華蓋
不向昆明數劫灰秋水渚涯浮地肺茅君局任守天台
倦游早欲依香火付與盧敖戲九垓

南洞居三首

絕磴垂蘿一徑分碧岩不與衆峰群祗疑洞口谿研石
渾是山頭片段雲病試术方疎藥檢書移冰研近爐薰

幽人許掾相問訊轉憶山陰王右軍

山中棟宇自齊梁唯數南巖古道場虎洞窺來光剌剌
鵝池臨罷綠泱泱天寒最覺松神王丹化懸知鶴壽長
珍重平生金鵲尾大茅峰下獨焚香

華陽南洞幽人居幽人本是山澤癯玉門砂無勾漏令
太平酒勝步兵厨洞穴巖岩肺腑隔菖蒲根節龍蛇枯
願從歲晚飽肥遯不待著論稱潛夫

歲晚一作歲寒

送日本僧

上人住處扶桑國我家亦在蓬萊邱洪濤拍屋作山立
白雲繞床如水流住世不知誰是客多時忘却故園秋
明朝相別思無盡萬里海天飛白鷗

錢塘西即事

苔竹溝深迷遠近置我洞庭青草湖飄風驟雨且高臥
來牛去馬非良圖中散幾時應罷鍛舍人何日共投壺
為留兵厨醺醪酒待看池蓮冰雪膚

鰲峰宜晚亭

鰲峰亭子偏宜晚約下烟光與細看獨鶴歸來頻寄語
夕陽春外一凭欄昔遊謝眺空陳跡回首敬亭生莫寒
萬一桑榆容倦翮西飛會訪毛公壇

鐵笛道人新居曰書畫船亭作詩以寄

蘇州去訪揚雄宅近水樓居似月波東府官曹知者少
西山爽氣望中多臺招天上仙人鳳池養山陰道士鵝
誰和淳風吹鐵笛莫愁艇子柳枝歌

寄楊廉夫鄭明德

快雪時晴春意動歸舟移纜向方塘走尋飲伴雞豚社
誤落詩名錦繡塲子雲奇字誰能問鄭老襟期獨不忘
闔閭城中可終老安得四萬買滄浪

馬伯庸中丞桐鄉阡遷祔有旨賜碑名肇文開
善有詩次韻

公家阡表似瀧岡總為能文補舜裳龍耳當承天子問
龜趺重表鄭公鄉異時將相寧無種此舉邦家亦有光
想見丹書映叢桂淮南無地著秋香

寄題陳渭叟紫雲編用張仲舉韻

葛溪觀主陳渭叟高行絕人詩益工明月雙珠好奇服
閒居七言成變風大茅獨立雲在下小史久住江之東
吳筠寥寥五百載唯我與君相長雄

新栗寄雲林

竭來常熟嘗新栗黃玉穰分紫殼開果園坊中無買處
頂山寺裏為求來囊盛稍共來禽帖酒薦深宜蘸甲盃
首奉雲林三百顆也勝酸橘寄書回

西爽軒次韻韓致用

大名誰及河東老為愛幽軒肯賦詩
沆瀣一杯凌倒景
闌干幾曲帶清漪徒聞東海投竿去
不似西山拄笏宜
兩岸菰蒲魚鳥樂繫船猶帶綠楊絲

答董子羽見寄

清都聞已住多年鶴駕鸞驂與後先
閭闔五雲宮樹暖
蓬萊初日羽衣鮮神仙翰墨唯皇象
史館人材總孟堅
天上春風如舊識殷勤吹送寄來篇

秋詞

香散天階靜玉珂水臺風殿夜如何星從河漢淡中落
秋在梧桐疎處多鸞影不曾離寶鑑蛛絲先已墜金梭
君王蠶館詢遺事却擬鑾車共載過

落一作沒

寄渭清遠記室

大石墜腰勤苦行此生深愧老盧能雨留澗下三板水
苔臥窓間七尺藤清磬鍾傳晨放梵雲門詩到夜挑燈
憑君試問龍河隱政在鍾山第幾層

吳興舟中

苔溪斫鱸腹偏腴取酒烏程清若无最憐楊柳破二月
絕勝蛾眉游五湖船頭濯足畏魚鯨港口卸帆驚鳥呼
林巒在處著舟楫倘有剩田吾欲租

次韻倪元鎮贈小山張掾史還寄元鎮

為愛髯張亦癡絕簿領塵埃多強顏何如膝上王文度
轉憶江南庾子山綠樹四隣懸榻在青溪千仞荷鋤還
風流耆舊凋零盡莫怪參軍語帶蠻

元統甲戌夏五月既望余客義興王氏懷慶堂

十又八日偕士友張德常謁張公洞得七言

詩一首寄住山陳長卿周仁仲

路入秋陰晝畫間
弭節洞靈俱啟關
東皇衣覆雲霧海
玉女盆盛人鳥山
牽騾步步跡石髓
投龍往往祝金環
茅家小史豈塵土
此地一游聊解顏

吳石居使君壽八十

大宗師兄
養浩父也

若翁腰帶玉圍虹
賸喜今年八十同
食邑嘗為驍騎尉

入城爭識鹿門公車回
晚望蓬萊日帽卸涼梳
菡萏風
兒子去為真學士未應
園綺住山中

吳養浩江浙提學任滿侍親歸番陽

穩送歸帆向錦江
西湖能負白鷗雙
書中久已知梁鵠
床下時曾拜老龐
封還畫省文章印
盛取玉堂雲霧窓
榮祿鄉中會耆舊
開筵應釀酒盈缸

題彭大年禱雨詩卷和仲舉韻
延祐己未開玄

道院作

羽衣秋薄剪湘荷茅屋山宮補綠蘿白石資方青飢飯
洪厓借乘雪精騾松雲暖憶春游嶽水草寒憐曉度河
使節南歸如見念峰頭笙鶴好相過

悼鶴

羽毛凍損雪欄斑碧落遊魂杳不還和靖船歸籠尚閉
浮邱經在壽能慳長身被裹玄黃內舊迹苔封紫翠間
欲撰瘞銘修故事寄書先報九華山

和實喇卜郎中上巳湖上道宮韻

望湖樓觀似山陰水邊麗人同賞心槐火新泉還有夢
玉魚葬地已無金三潭雨壓蛟龍睡半嶺風傳鸞鳳音
擬續臨河修禊事塵埃蠶紙不堪臨

代溪月翁和吳宗師所寄賜酒感興詩韻

年年恩霈出皇家此度仍回八月槎望闕蒼龍分瑞靄
開樽白獸瀉流霞箋天久已知心事鑑水唯應換鬢華
遙想新春供大禮班頭對御祝椒花

柳道傳送別還茅山次韻復謝

烏蜀先生相見稀鍾陵初載橐書歸江南蕭艾作人立
卷裏盧龍看雪飛最憐玉斧有道氣重惜子真猶布衣
去去空山相憶夜朱絃三歎為君揮

次韻題呂氏園館

因向雲間求二陸西施浦口弄雲沙東風勒住螭頭舫
微雨催開蠶粟花到處華房通曲密舊時醉墨誤欹斜
一聲歌板銀瓶側亦見玉童雙髻鴉

和坡仙寒食詩

并序

先生在鳳翔和子由此詩嘉祐八年也書此
詩則元祐二年在翰林時也啼鵲世本作啼
鵲當以其迹為正周顏志先生論書有云端
莊雜流麗剛健含婀娜觀此帖益信今年寒
食適二月將晦輒次韻一律仍用首句云帖
得之於僧笑笑隱笑隱平生習書所寶者此爾
寒食今年二月晦又分新火到厨烟碧桃花落閒誰埽
白苧衣輕老更便發篋但餘金薤墨考年正在玉堂編

大書絕類顏光祿小字駸駸逼墓田

再次韻實喇卜郎中春游二首

楊柳三眠午未醒楊花飛雪散星星海中蜃氣春浮島
月下胎仙夜降庭尺素書來雲錦織紫鱗躍處浪紋腥
樓前政有三株樹剪斷西山一半青

隣近桃源雞犬家不緣迷路得看花衣裳總濕三危露
服食唯消五色霞鶴塚浪磨崖上字漁舟潮閣渡頭沙
石盤碁子都狼籍莫向人間問歲華

歐陽巡尉遇仙卷

寶圭風洞鼓鉦鳴獨挈仙壺一世驚
勾漏丹砂還道術瀧岡阡表足家聲
芙蓉城小花周匝枸杞叢深犬吠迎
不上飈梯十二級白頭空愧學長生

伏蛟臺胡道玄請題伯生有記

豫章自昔旌陽宅借問仙都已劫灰
西山應無剪柏處東湖遂有伏蛟臺
千年鍊札化為石十日陰風怒若雷
妖孽不生寰海靜五陵佳氣待君來

浴鵲灣題壁

泱流亂石幽栖地
子美詩中蕭史家
白髮羽衣元自稱
風流異代不須嗟
竹緣迂籬編笋叢
礙低垣雨臥花
豈少烟霞閒艇子
一枝聊贈老生涯

送姚煥章還京口兼簡張率性

江鄉人事凋訛盡
人日題詩復送行
十載歸來訪隣里
他年科第屬門生
春泉暗動金沙井
晴雪微棧鐵甕城
推官廳有詩人住
閒暇相求一寄聲

和丹邱生悼吾子行書遺墨後

故人亦復葬江魚空向人間憶子虛月下簫閒留譜在
竹邊房冷倩誰居蓬萊都水題金簡汲塚先秦見漆書
惟有研山磨不朽時時淚滴玉蟾蜍

八月十五夜待月

移牀露坐閒臨水浴鵲灣頭足芰荷秋已平分催節序
月還端正照山河老憐宋玉生悲思狂憶桓伊作浩歌
雲漢茫茫一卮酒白頭慚愧古人多

次韻韓伯清見寄

塵海幽居似地仙，滿牀堆笏是家傳。
座中桃李春風酒，郭外桑麻杜曲田。
倚蓋一松扶偃蹇，影娥片月弄嬋娟。
池邊草色撩詩思，未覺才情讓惠連。

月山石詩

拾得金錢溪上石，小峰如弁立雲根。
他山鳥道隔千里，新月蛾眉見一痕。
入林誤踏金臺背，激水猶思雪浪盆。
擬就漫郎呼酒舫，石魚湖上共窪尊。

春將過半病懷索莫惜無可與言詩者得句自遣山澤癯者云

一一花栽繞屋廬半春多病意何如緣詩太瘦終無補
與酒全交漸要疎研席留香非長物齋庖得笋是佳蔬
鶴群呼喚來同飲新綠濺濺已滿渠

士弘賢良猥贈佳什空山真有似人之喜即與奉和所望為晚菊一來山也丙戌夏作

南州高士祗徐君野鶴昂然自不群心似寒潭冰下水

身如秋嶺雨餘雲
藝蘭何待樵青斧
醺酒難尋李白墳
為問別來能幾日
城中消息了無聞

方泳道令尹水竹亭

水竹亭子在花山
輪與幽人日倚欄
蒼雪四簷迷窈窕
綠波三面浸琅玕
扶行綠竹鳩形杖
濯足金沙鴨嘴灘
幾樹甘棠同召伯
更留清節比方干

善權山洞

善權離墨爭盤紆
浩劫礪礪仙人廬
莘莘石林壓水府

往往閣道通樓居壁藏已出黃素卷穴處尤多青綠魚
愛此長連煮藥竈待我盥漱霑遺餘

次松瀑黃尊師寓籌峰韻

甲寅春

保大誰傳墨半規筆蹤驚見十年遲風流邱壑真吾事
名教衣冠異昔時書別左公尋解劒酒深東老獨留詩
谷山長在通玄頂笙鶴相過自有期

快雨喜晴而開陽室適成賦詩自慰

春來耽酒仍耽困一枕雨聲如蜜甜老鍾栽松寧有待

飢腸食笋獨無饜峰連筆格安空翠泉入茶鑪鬪谷簾
吾愛吾廬聊復爾少留佳日在茅簷

女仙江靜真碧遊仙詞

衣劍符圖有子傳生如孤鳳蛻如蟬方留橘葉聊供母

誰信桃枝已得仙

張桃枝漢司隸校尉朱寓季陵母也
行陰德久聞在易遷得為侍郎事見

真

蕭索簾幃通素月玲瓏環珮曳空烟麻姑壇上花姑

老想共乘鸞欲著鞭

越靈峰寺之松風閣

谿谷風聲何瑟瑟嘯歌長在兩長松金雞翔舞不多見
青壁蚤緣知幾重花時掃閣黃塵滿泉處鑿厓甘露濃
待我與攜笙鶴去香爐對面禮陶峰

筆塚

退筆如陵那忍棄斂藏數籠瘞岩阿管裁犀象寧同殉
研歷冰霜尚可磨兔窟早空金椀地鵝峰深潤墨池波
毛穎有靈應感遇秦恩自少主恩多

次桑善止韻是日廉夫楊尹見訪

髮脫冠欹衰態多日長猶賴飲無何阿對泉頭布衣老
謝公墩上美人過青松豈代塵尾柄如意莫擊珊瑚柯
校書天祿餘事耳遲子考槃同礪阿

次韻王文友送遊張公洞

庾桑成道來孟峰再拜攝衣昇故宮馨香果核猶可拾
顛倒雲氣長相蒙有時月明鐘磬發絕頂濤聲舟楫通
看從便道之五嶽腰插騾鞭追老翁

再次倪元鎮韻

嗜石未數奇章公太湖洞庭無此峰便擬翻身入青壁
誰見抱膝哦長松乳香從令飛鼠飲絕路或與樵人逢
玉女下房不可到只許雲氣隨飛龍

黃一峰畫貞居圖

北苑南宮凝絕筆蟠胸磊砢若為裁按圖寧在多多許
落墨真成滾滾來百折丹梯凌礧道一川澌水動灣洄
時清誰問商於路乞我西山錦繡堆

代玄覽真人次虞伯生見寄韻

屋倚松杉路擁莎金鰲小隱且婆婆幾年有約遙相望
一棹何時肯見過老去山中空歲月秋來江上政風波
黃花滿眼香醪熟對此其如逸興何

又次韻

別後驚心歲已馳幾回草夢遶春池新詩遠寄迢迢驛
舊約重看絕妙碑鰲禁風清班綴玉龜溪雪冷鬢垂絲
何時共執論文酒坐對西窓待月遲

贈姜彥翁秀才

并序

會稽姜彥翁傳家子早游杭學執事俎豆間
垂廿載季試輒居前列遂被省檄充郡吏且
待補之日長與樵牧僮豎為師友其居適臨
山館求予言辭既不獲敢以忠告之比凡故
事彥翁之所習聞請論以近若晉寧張仲舉
氏與予同師仇仁近先生為童子師至金陵
京師遷揚州終始授徒為業四十載不繇科
第不涉貢吏一日姓名上聞置之玉堂之署

編修應奉如取券納物其進未可量日來置
史局為吏服者方俛首虞箠笞之不暇稽古
之力儒者小試之效已如此古今曷有異途
在所存何如耳予持此以發彥翁趨向之端
復為詩以堅其雅志云

科舉恩霑鄉貢榜學校例貢諸生員多岐取士從潤色
百骸受蟲爭蝨緣窮巷授徒缺養母普天為吏橫索錢
妙年立身在擇術老生常談無棄捐

和黃晉卿提舉憶舊詩

支許何能接王謝
山陰圖畫畧相同
能留繭紙真奇事
愛養鵝群少道風
苔樹斲冰春未破
花菱削雪酒如空
深慙故舊相料理
肯使牢愁坐五窮

天師素華閣

仙家樓閣風塵表
更築凌空月榭高
虛白豈知存夜氣
太清還許隔秋毫
溪光澹澹冰填壑
松響離離雪舞濤
此去銀橋通咫尺
神仙直下有靈鼇

碧筒飲

採綠誰時作羽觴使君亭上晚尊涼玉莖沁露心微苦
翠蓋擎雲手亦香飲水龜藏蓮葉小吸川鯨恨藕絲長
傾壺悞展琳琅袖笑絕耶溪窈窕娘

上京賜宴王眉叟有詩次韻

從事何緣過草堂行都遣賜玉壺方遠勞使者紅塵騎
爛煮仙家白石羊中聖敢辭千日醉承恩獨許四明狂
金莖賸有三清露潤及葵心向太陽

句曲外史集卷中

欽定四庫全書

句曲外史集卷下

元 張雨 撰

詞

東風第一枝

清淚如鉛綠房迎曉寶階低擁雲葉蜻蜓飛上搔頭依
前艷香未歇西窓暗雨怪簾低參差涼月正一叢深倚
琅玕石上只愁磨折 問瑤草應憐短髮曾醉墮無聲
膩滑羞他金雀鈿蟬高似水仙羅襪芳心斷絕誰與贈

湘臯瓊玖試折花擲作銀橋看舞素鸞回雪

蝶戀花

次疎翁
冬至韻

空谷天寒殊慰藉半幅瑤華喚得春回也金馬玉堂猶
傳舍嵩雲潁水風流夜馳騁莊騷凌鮑謝昔日忘年
解后鴻濛野愁絕朱絃誰為寫高情那復如疎者

銘

方隅洞銘

洞玄洞虛方山之隅開廓非有杳冥非無玄窓仰窺玉

几俯捫願降霞人接我高奔

玉磬池銘

并序

外史菌巢東南之偏鑿池瀦泉與崖室相周
旋象形以磬名焉因勒銘于其垠

玉斯潔磬斯折德象著地寶泄琤琤十六銘池淺玉或
有力者終負去未若藏斯磬于空谷吾見其不舍晝夜
而奏雲門大韶之曲也

石室銘

并序

外史承留侯之裔修隱居之業年六十遷南
峰靈石礪所著老氏經集傳茅山志幽文玄
史與其詩若干卷藏龍井之石室解所服劍
代其形合藏焉以示道之不可傳者既闔戶
勒銘其上曰

藏書何為道無累猗瘞劍何為神無體猗玄室之閔閱
千歲而未始猗 大元癸未歲吳郡張雨造

記

真樂軒記

茅山建炎之洞雲菴至元間被璽書是為紫陽觀殿廬
之陰壁斗澗淙景氣幽歛嗣主是者湯君玄窓比歲壬
申益方丈東偏尋丈之室而舟其制榜曰真樂蓋取畫
舫齋語云夫六一公退思險歷江漢豈真樂於舟居及
羨夫江湖散傲若有所未暇則又曰舟行豈不樂哉玄
窓徒慕公之語簞邱瓢壺固無波濤蛟鼉之危而亦未
嘗識延緣叢葦間拍浮酒船之為逍遙之游也擬舫齋

而曰真樂是徒慕其語非耶雖然被褐巖栖之士顧未能濯足扶桑東觀蓬萊又豈公卿大臣涉世風波之迹所比倫哉居是軒也半席焚香燕坐移頃元氣為舟微風為施其翺翔容冶之樂仲長統尚能言之玄窓知之則真樂在此而不在彼矣吾所以知真樂之然者以此至順四年癸酉三月十八日句曲外史吳郡張天雨書

贊

外史自贊畫像

志逸心疲身清命濁逃同類而親猿狙毒厚味而羹藜
藿學取益而不勝其損事知危而姑與之安一龍一蛇
不厭已之深渺惡衣惡食先憂人之飢寒忽然為人而
反常若此何以祛有身之患

傳

中獄外史傳

米芾字元章襄陽人博洽記聞於群經務通大旨論議
斷以己意其辭發揚蹈厲世儒所不能屈為文務崖絕

魁壘要必已出為工悟竹簡以竹聿行漆故篆籀法先
秦正書魏晉而下無取愛潤州江山因定居北固作寶
晉齋前有碧梧廿本甘露降其上蓄王謝真蹟右軍紫
金石硯善畫古聖賢像及寫山水幅長不過三尺制白
玉圖書印六文曰辛卯米芾米芾之印米芾氏米芾印
米芾氏印米芾元章印性至潔置水其傍數盥而不悅
未嘗與人同服器客請閱法書對設兩案手為舒卷懼
客手袖觸之則一裝洗之也嘗願死作蠹書魚游於金

題玉躑間而無害妙解音律作五音正韻用以制律本
五聲之音出於五行自然之理管仲深明其要著其形
以為太平作樂之具沈隱侯得四聲而不得宮聲乃分
平聲為二以欺學者陸德明遂以吳音傳會至是始自
五方立五行求五音乃得一聲於孟仲季位因金寄土
五音皆具有聲無形互相假借千載之下神姦鬼祕無
所逃形云又著天說備究天地日月旁側盈虛之形撰
晝夜六十圖與潮汐大小准援據六經盡黜古今百家

之妄其書藏之名山平生與游率天下士蜀郡劉涇長
安薛紹彭好奇尚古是其一流人也風神散朗服唐人
冠衣眉宇軒然進趨襜如音吐鴻暢雖不識者皆知為
元章也晚為臨川王公眉山蘇公所深知臨川絕愛其
詩摘句書於便面蘇公有云元章奔逸絕塵之氣超妙
入神之字清新絕俗之文相知二十年恨知公不盡答
曰更有知不盡處修楊許之業為帝宸碧落之游異時
相見乃知也初宣仁高后在藩與其母丹陽君有舊元

章長於邸中以恩補校書郎授合光尉尉遷入淮南幕
改宣德郎知雍邱縣乞監中嶽廟因號中嶽外史崇寧
間置書畫學公時在太常為博士因進上所藏書若畫
皆不下一品優禮答之詔用黃庭小楷書千文出知常
州不赴改管勾洞霄宮就除知無為軍元章性好石無
為公解有奇石元章驚喜曰吾當兄事之遂具袍笏再
拜未幾召為書畫學博士尋擢禮部員外郎以言者罷
知淮陽軍彌年瘍生于首即上書謝事不允卒於郡齋

年五十有七大觀三年葬於丹陽長山下有自寫海岳
菴淨名齋圖著山林集十卷並傳于代丹陽蔡肇嘗銘
其墓予怪其叙事多脫落故為搜剔舊聞補葺為中岳
外史傳昔賀知章號祕書外監而元章號中岳外史張
長史旭稱賀八清鑑風流千載一人也予用為米元章
傳贊當世不能損益云

句曲外史集卷下

欽定四庫全書

句曲外史集附錄

句曲外史張伯雨墓誌銘 劉基伯溫撰

外史錢塘人姓張氏字伯雨六世祖九成以狀元擢第
于宋傳四世至逢源仕宋為奉議郎通判漳州逢源生
有孫有孫生雨雨性狷介常眇視俗悒悒思古道知
弗能與人俯仰遂挺身戴黃冠為道士登茅山受大洞
經籙豁有所悟遂覓出群道士表道士見雨神益完貌

益固雖其師亦莫能測也雨獨與學士吳興趙文敏公
善每以陶弘景期之雨自號句曲外史明年開元宮王
真人入覲京師外史自副時范德機以能詩名外史造
范范適出有詩集在几上外史取筆書其後為詩四韻
守者見則大怒趨白范而范驚曰吾聞若人不得見今
來天界我友也即自詣外史結交而去繇是外史名震
京中一時賢士大夫若浦城楊仲弘四明袁伯長蜀郡
虞伯生爭與為友願留之京師外史雖為道士恒以親

老為憂延祐初謝觀居開元宮明年杭災宮毀外史適
華陽至元丙子以上塚告歸遂不復去年已六十矣先
葬冠劍于南山而辭宮事但飲酒賦詩或焚香終日坐
密室不以世事接耳目後卒于宮之齋居篋無遺物也
外史素不與俗人交人有不善輒面折而有善亦未嘗
不力揚之故遠近之有學者無不願踵其門雖不見許
可退亦不敢憾非其識見精敏操履端正何能使人畏
服若是哉至正乙酉基以提舉儒學備員江浙始獲與

外史一見即如平生歡明年七月而外史卒嗚呼世之
拔流俗而行者鮮矣得斯人焉而弗獲久與遊寧不深
可惜哉外史既卒于是宮之掌事及其弟奉其棺葬於
冠劍之所而基適迫棘闥事弗能預執紼及出為訪外
史遺蹟而為之銘而外史之徒若子弟無能承外史之
志者外史已矣有友而弗銘咎將誰歸於是乎銘銘曰
孰與之軀以為吾拘式還其虛杳兮冥兮吁嗟乎幽墟
嘗攷外史之交盡當時海內名士而為之銘者則晚

交之誠意公也蓋公之才器非外史莫能識而外史之玄德懿行非公亦莫之能銘是不可以或然論也觀公之誌恒以不獲久交外史為惜以愚臆之在外史之靈亦不能不以得公之銘為慰也第其生卒年月誌不顯具於後此姚氏之傳牴牾特甚似不可以無辨按誌稱外史以延祐初居開元明年適華陽至元丙子以上塚東歸遂不復去年已六十矣逮至正乙酉公始以提學友外史明年七月而外史卒據此

則外史之生當在宋端宗景炎丁丑其卒之歲則至
正之丙戌也姚謂以丁丑歲出茅嶺庚辰歸陽德館
丁卯造水軒于浴鵠灣明年刻詩于藥井上時年七
十有六亦不錄其生卒此皆可疑者也夫以劉公親
交外史而姚則得之傳聞宜若舍傳而信誌然集中
有丁亥十二月五日雪晴及六日喜晉卿至二詩皆
用綾字韻末復有再用丁亥歲雪韻懷中舉一首而
後此別無戊子己丑之編則知此數詩去絕筆蓋無

幾矣苟謂此為前至元之丁亥則尤不可信也况送
錢思復之永嘉詩題下注八年九日四字而元之編
年自元貞以來無所謂八年者獨庚申帝有之實至
正戊子也其諸外史以是年刻詩藥井不久而黃篋
告終歟若然則作軒之年當為丁亥而七十有六之
六則二字之誤也誌所謂明年七月又當為八年某
月無疑矣蓋明又捌之似也校閱之餘漫為拈出以
俟博雅君子之補正若夫傳世之大者固知不在此

也嘉靖癸巳清和月吉石樓野生謹識

句曲外史小傳

外史杭之錢塘人姓張名雨又名天雨字伯雨號貞居子宋崇國文忠公九成之裔年二十棄家徧遊天台括蒼諸名山吳人周大靜為許宗師弟子得楊許遺書外史師事之悉受其說入開元宮從真人王壽衍為道士名嗣真風裁凝峻見者異之見趙松雪承旨趙見其作字勁健贈以雲麾將軍碑墨令師法之書果超越儒學

提舉楊廉夫許在陶貞白上飲酣伸紙作大草尤妙小
楷變率更家數世稱二絕詩宗杜惟肖古選類大厯間
諸子文學韓而冷語類漢獨於畫未工或引敗筆點綴
木石人物亦自賞適蓋論意不論象也壽衍嘗偕入京
時燕地未有梅惟吳閒閒宗師自江南移植護以穹廬
扁漱芳亭外史造其所恍與西湖故人遇徘徊既久不
覺熟寢其中壽衍竟日不見憂其迷路外史覺而已晡
閒閒笑曰伯雨素有詩名宜有作遂賦長詩有風沙不

金
卷之八
集賢表伯長虞伯生揭曼碩諸公和之繇是名大起一
時浦城楊仲弘清江范德機金華黃晉卿吳興趙仲穆
交甚善它日謁虞虞問能作符篆否答曰未能虞連書
七十二家示之即下拜曰真吾師也自後凡與虞手札
必執弟子禮其服善類此壽衍復偕入朝被璽書賜驛
傳欲官之非其志也即自誓不更出因三茅有招赴之
奉任君而下五君為文告之願畢力茲宇所著山世集

三卷碧巖玄會錄二卷尋山誌十五卷考索精博又著
玄史自序曰老子玄足者也是集獨不與者尊之至也
嘗悅劉大彬所修茅山志因號句曲外史丁丑歲出茅
嶺庚辰歸陽德館作黃篾樓儲古圖史甚富往來靈石
山之精舍丁卯按丁卯當作丁亥造水軒于浴鵠灣明年刻詩
藥井上時年七十有六按七十有六當作七十有二其所居又有開
元靜舍南真館老學齋與會稽王山農上清薛玄卿章
心遠龍翔毛伯圭輩相友善多文字酬酢廉夫避地於

蘇之錦繡坊外史以其知己數造焉廉夫推為前輩每題其製作曰貞居先生其有手鈔一帙遺胡季城題云紅巾寇抗先生墨跡在黃箴樓者不與焦炬同化則與和載同逝矣此鈔豈非晉武庫之遺劍也耶有吊其亡曰黃箴樓頭仙一去明年黃箴歸狼烽不知天上修玄史只訝山中伴赤松石室祕書愁攝電星池遺劍已成龍思君不見夜開戶月在金鐘玉几峰又為安陽韓致用題其手削卷尾曰雖疏俗出語亦別殆欲過晉人筆

古矧其辯論道德文章事乎廉夫一代人望獨於外史
重其不輕許可較然矣手營墓于靈石西湖之陰南屏
之右前阻澗瀍繫腰作梁名玉鈎橋南數十武作藏書
石室自勒銘而吳睿隸古綬五七年前從甘泉劉邦彥
得八帖往往言造酒必善飲又見其手錄詩文各一冊
予以古書畫一卷易得詩冊計二十六紙五七言詩八
十一首中有附錄遂昌鄭明德東海倪元鎮龍河僧大
訢詩十餘首其不遺故人之善如此又於邦彥得二紙

其紙標丁亥二字其詩文必多故編年書之旁二行云
繆作積歲月成帙初不事深僻覽者或昧其所從來易
玄久許一箋請如古法簡要疏於語下尚藉是以傳焉
予不考易玄何人成化丁酉杭有攜其像入金陵者人
得即携涉楊子亟遣人物色之以歸為文酬之是冬又
得其台仙閣記一軸詞翰益蒼古戊戌予偕羽士史玄
隱拜其墓為詩吊之桐村牧周伯器亦有詩在別楮意
其或埃壒之表爽爽不昧尚化鶴來予丹邱曠世而神

交否乎著小傳為書其遺墨後仍勒之石庶觀者有足以論其世也論曰


嗚呼兩間所靳者名道德之外有事功有文墨皆分定不可兼得一之已足尚矣有其二而道或汙焉亦奚尚乎外史所有種種超越名孰與靳故曰諒無金石固榮名以為寶山澤之臞列仙之儒其斯人歟成化十五年九月朔日嘉禾姚綬書

外史先生蘊句吳清淑之氣飫天台括蒼吐納之腴

稅駕茲山充養益粹故其詩辭自得情逸調諧揮灑
所至神閒勢應一時名家宗匠談笑而頡頏之固其
所也今觀其適意之作則猶太虛冲融風日流麗幽
蘭在谷一笑自媚及其感時慨事撫懷亢論則雖秋
月高寒白露慘下深林如畫孤鶴長唳未能盡喻也
黃篋手鈔編年列類所積富矣惜乎兵火薦罹歲蟲
月蝕逸而存者無幾其間得之者或寶有而靳於傳
或欲傳而沮於力斯文之晦識者興嗟應符藉父師

之仁覆襲靈真之勝壤塊食無裨良用耿耿私淑之
餘於凡先生舊所經歷之地靡不窮搜博購積累既
久什或得其二三亦欲俟其全而後壽諸梓與貞白
山世諸編並傳顧惟歲月遄邁人事靡常故以讐校
類次之任付之名者僭題曰遺集而鋟焉雖於真風
玄訓莫能葳紹其萬一然假是錙銖之勤以為素飡
之贖固惓惓自負之誠也既訖工因題數語於卷末
以識歲月云嘉靖十有三年歲在甲午春正月哉生

魄節齋陳應符敬書



句曲外史集附錄